

STUDENTSKO VIJEĆE

STATUT

Tuzla, 2018.godine

Na osnovu člana 94. Statuta, Upravni odbor Studentskog vijeća Visoke škole za finansije i računovodstvo na sjednici održanoj 2018. godine u Tuzli donio je:

STATUT STUDENTSKOG VIJEĆA VISOKE ŠKOLE ZA FINANSIJE I RAČUNOVODSTVO FINra TUZLA

I. OSNOVNE ODREDBE

Član 1.

- 1) Studentsko vijeće Visoke škole za finansije i računovodstvo FINra Tuzla (u daljem tekstu: Studentsko vijeće) je demokratski organizovano udruženje koje djeluje kao izborno krovno predstavničko tijelo koje zastupa interese studenata, sudjeluje u radu i odlučivanju u tijelima Visoke škole za finansije i računovodstvo (u daljem tekstu Visoka škola FINra), te obavlja druge poslove utvrđene Zakonom.
- 2) Studentsko vijeće je nepolitička, nestranačka, nevladina i neprofitna organizaciona jedinica koja poštuje načelo jednakosti svih građana, te prava i slobode svih nezavisno o rasi, boji kože, spolu, jeziku, vjeri, političkom ili drugom uvjerenju, nacionalnom ili socijalnom porijeklu, imovini, rođenju, obrazovanju, društvenom položaju ili drugim osobinama.

Član 2.

- 1) Najviši akt Studentskog vijeća je Statut.
- 2) Statutom se propisuju temeljne odredbe i organizacija Studentskog vijeća, način rada, sastav, nadležnosti, finansiranje, te druga pitanja od značaja za rad Studentskog vijeća u skladu sa Zakonima i Statutom Visoke škole FINra.
- 3) Statut Studentskog vijeća donosi Upravni odbor Studentskog vijeća (u daljem tekstu: Upravni odbor) dvotrećinskom većinom svih članova.
- 4) Pored Statuta Studentsko vijeće ima i Pravilnik o radu, i druga akta neophodna za funkcionisanje.

II. ČLANSTVO

Član 3.

- 1) Članovi Studentskog vijeća su svi studenti Visoke škole FINra, bez obzira na status.
- 2) Studenti postaju članovi Studentskog vijeća upisom na Visoku školu FINra.
Članovima Studentskog vijeća zagarantovana je sloboda mišljenja i izražavanja u okviru Studentskog vijeća, kao i u svim drugim tijelima Visoke škole FINra.

- 3) U okviru rada Studentskog vijeća nije dozvoljeno političko, vjersko i stranačko organizovanje i djelovanje.

Član 4.

- 1) Počasni članovi Studentskog vijeća mogu biti studenti i nastavnici iz zemlje i inostranstva koji svojim radom, djelatnošću i materijalno-tehničkom pomoći doprinose ostvarenju programskih ciljeva i zadataka Studentskog vijeća.
- 2) Počasne članove Studentskog vijeća bira Upravni odbor.
- 3) Počasni članovi nemaju pravo odlučivanja, niti pravo da budu birani u organe i tijela Studentskog vijeća.

III. STATUS, NAZIV I SJEDIŠTE

Član 5.

- 1) Studentsko vijeće je posebna organizacijska cjelina koja djeluje autonomno u okviru Visoke škole FINra pod nazivom: Studentsko vijeće Visoke škole FINra u Tuzli.
- 2) Sjedište Studentskog vijeća je u Tuzli, ul. Mitra Trifunovića Uče br. 9

Član 6.

- 1) Studentsko vijeće ima svoj pečat.
- 2) Pečat Studentskog vijeća je plave boje, okruglog oblika, prečnika 50 mm, na kome je znak Studentskog vijeća u sredini i natpisi: „Studentsko vijeće Visoke škole FINra u Tuzli“.

IV. DJELOVANJE STUDENTSKOG VIJEĆA

Član 7.

Temeljne nadležnosti Studentskog vijeća su:

- a) donosi opšte akte o svome radu;
- b) osniva radna tijela koja se bave pojedinim poslovima iz nadležnosti Studentskog vijeća;
- c) bira i razrješava predstavnike studenata u Senatu i drugim organima i tijelima Visoke škole FINra;
- d) donosi godišnji plan i program aktivnosti Studentskog vijeća;
- e) donosi opšti akt kojim se uređuje organizaciona i funkcionalna povezanost Studentskog vijeća sa studentskim vijećima organizacionih jedinica u sastavu Visoke škole FINra;
- f) razmatra pitanja i sprovodi aktivnosti u vezi sa obezbjeđenjem i ocjenom kvalitete nastave, reformom studijskih programa, analizom efikasnosti studiranja, utvrđivanjem broja ECTS bodova, unaprjeđenjem mobilnosti studenata, podsticanjem naučnoistraživačkog rada studenata, zaštitom prava studenata i unapređenjem studentskog standarda;
- g) učestvuje u postupku evaluacije Visoke škole FINra, u skladu sa Statutom Visoke škole FINra i drugim aktima;
- h) ostvaruje studentsku međunarodnu saradnju;

- i) Senatu Visoke škole FINra daje prijedloge u vezi sa utvrđivanjem prijedloga godišnjeg programa rada Visoke škole FINra u skladu internim aktima Visoke škole FINra;
- j) predlaže nadležnim organima Visoke škole FINra plan finansiranja studentskih aktivnosti;
- k) usvaja godišnji izvještaj o radu koji kreira predsjednik;
- l) obavlja i druge poslove u skladu sa Zakonom, Statutom Visoke škole FINra, ovim Statutom i drugim aktima Visoke škole FINra i Studentskog vijeća.

Član 8.

Programski ciljevi i djelatnosti Studentskog vijeća su:

- a) Poštivanje prava čovjeka i građana zagaranovanih međunarodnim sporazumima, ustavom, zakonom i drugim pozitivnim pravnim propisima Bosne i Hercegovine;
- b) Kontinuirana briga o statusnim pitanjima studenata u vezi sa studijem;
- c) Briga o studentskom standardu i pravima studenata;
- d) Afirmacija moralnih, naučnih, umjetničkih, kulturnih i intelektualnih vrijednosti bosanskohercegovačkog društva i na tim vrijednostima, kao i na civilizacijskim tokovima, razvoj svestrane ljudske ličnosti;
- e) Uključivanje studenata u evropske i svjetske tokove života, prevazilazeći geografske i političke regionalizacije i ograničenja, kao i uključenje studenata u sve tokove obnove i razvoja Bosne i Hercegovine;
- f) Zalaganje za slobodu naučnog, umjetničkog, nastavnog i obrazovnog procesa, te otvorenog dijaloga sa društvom;
- g) Uvođenje studenata kroz obrazovni proces u naučne i stručne projekte od značaja za Visoku školu FINra i Bosnu i Hercegovinu;
- h) Uspostavljanje međunarodne saradnje na naučnom, kulturno-zabavnom i sportskom nivou;
- i) Obezbjeđivanje stručne literature, opreme, repromaterijala i drugih sredstava za poboljšanje nastave i studentskog standarda;
- j) Organizovanje naučnih/umjetničkih seminara, javnih tribina, kurseva i prezentacija u saradnji sa studentima, nastavnicima i stručnim saradnicima;
- k) Organizovanje studentskih putovanja i turističkih manifestacija;
- l) Organizovanje kulturno-zabavnih priredbi i takmičenja;
- m) Organizovanje sportskih aktivnosti studenata;
- n) Ostvarivanje saradnje sa privrednim subjektima, javnim ustanovama i državnim institucijama na polju srodnih djelatnosti;
- o) Permanentne aktivnosti na ostvarivanju optimalnih uslova socijalno-zdravstvenog i materijalnog obezbjeđenja studenata, kao i stvaranje uslova za uključivanje diplomanata u proces rada;
- p) drugi ciljevi i djelatnosti koji proizilaze iz uloge i nadležnosti predstavničkog tijela studenata.

Član 9.

- 1) Studentsko vijeće može u okviru svojih djelatnosti i programskih ciljeva osnovati subjekt za privredne i druge djelatnosti pod uslovima određenim zakonom.

- 2) Djelatnosti Studentskog vijeća se mogu ostvarivati kroz privremena i stalno formirana tijela.
- 3) Načela djelatnosti Studentskog vijeća su: poštivanje različitosti stavova, misli i ideja, sloboda izbora, samostalnost organizacije u radu, javnost i demokratičnost mišljenja, te odgovornost pojedinca i organizacije za rad.

V. ORGANI I STRUČNA TIJELA STUDENTSKOG VIJEĆA

Član 10.

- 1) Organi Studentskog vijeća su: Upravni odbor, Predsjednik UO Studentskog vijeća (u daljem tekstu: Predsjednik), zamjenik predsjednika i sekretar.
- 2) Studentsko vijeće može, po potrebi, imenovati i dva potpredsjednika, koji će obnašati funkciju zamjenika predsjednika.
- 3) Upravni odbor može radi obavljanja poslova iz svoje nadležnosti osnovati stalna i povremena stručna tijela (komisije).
- 4) Lica u organima i tijelima Studentskog vijeća mogu biti studenti koji ispunjavaju uslove iz člana 3. Statuta.

Upravni odbor Studentskog vijeća

Član 11.

Upravni odbor je najviši organ Studentskog vijeća. Upravni odbor, u pravilu, ima 13 članova. Broj članova Upravnog odbora prema potrebama može se proširivati, o čemu posebnu odluku donosi Studentsko vijeće.

Član 12.

Upravni odbor:

- a) bira i razrješava predsjednika Studentskog vijeća, potpredsjednika i sekretara;
- b) utvrđuje prijedlog Statuta;
- c) donosi pravilnik o radu Upravnog odbora;
- d) donosi opšte akte;
- e) stara se o zakonitom obavljanju poslova Studentskog vijeća;
- f) razmatra i usvaja izvještaj o radu i program rada;
- g) imenuje stručna tijela Studentskog vijeća;
- h) donosi budžet i godišnji obračun (završni račun) Studentskog vijeća;
- i) odlučuje o dodjeli nagrada Studentskog vijeća;
- j) prihvata izvještaje o radu tijela Studentskog vijeća;
- k) razmatra problematiku studiranja, studentskog standarda, reforme studija i druga pitanja važna za položaj studenata i kvaliteta studija te donosi zaključke koji obavezuju druga tijela Studentskog vijeća;
- l) obavlja druge poslove u skladu sa opštim aktima Studentskog vijeća.

Član 13.

- 1) Skupštinu saziva Predsjednik UO Studentskog vijeća, najmanje jednom u šest mjeseci. Upravni odbor se saziva pisanim ili elektronskom poštom upućenim pozivom koji sadrži najmanje sljedeće podatke: dan, sat i mjesto održavanja sjednice, prijedlog dnevnog reda i dokumentaciju nužnu za razmatranje pojedinih pitanja.
- 2) Sjednica Upravnog odbora može biti redovna i vanredna. Poziv o održavanju redovne sjednice Upravnog odbora se upućuje najmanje pet dana prije njenog održavanja. Poziv o održavanju vanredne sjednice Upravnog odbora se upućuje najmanje tri dana prije njenog održavanja.
- 3) Ako Predsjedavajući, na prijedlog najmanje 25 članova ne sazove Skupštinu u roku od 15 dana, Skupštinu mogu sazvati predlagači.

Član 14.

- 1) Dnevni red sjednice predlaže Predsjednik Studentskog vijeća, a utvrđuje Upravni odbor. Skupštinom predsjedava Predsjedavajući Upravnog odbora, ako Upravni odbor ne odluči drugačije.
- 2) O sjednici Upravnog odbora vodi se zapisnik koji sadrži: popis prisutnih, dnevni red, zaključke o svakoj tački dnevnog reda, te potpis zapisničara i predsjedavajućeg.
- 3) Upravni odbor može raditi i donositi odluke ako je prisutna natpolovična većina članova, a donosi odluke većinom glasova prisutnih članova, izuzevši slučajeve koje predviđa ovaj Statut ili drugi akt Studentskog vijeća.

Član 15.

Rad Upravnog odbora i način donošenja odluka bliže se određuje Pravilnikom o radu Studentskog vijeća.

Član 16.

- 1) Predsjednika Studentskog vijeća bira Upravni odbor na mandat od godinu dana, koji se može ponoviti.
- 2) Predsjednik se bira većinom glasova ukupnog broja članova Upravnog odbora. Ako nijedan kandidat nije dobio takvu većinu, u drugom krugu izbora, u koji ulaze dva kandidata s najvećim brojem glasova, smatra se izabranim kandidat koji je dobio većinu glasova prisutnih.
- 3) Nadležnosti predsjednika:
 - a) predstavlja i zastupa Studentsko vijeće;
 - b) predlaže zamjenika/potpredsjednike predsjednika Studentskog vijeća;
 - c) može podnijeti inicijativu Skupštini za smjenu zamjenika/potpredsjednika Studentskog vijeća;
 - d) predlaže program rada i razvoja Studentskog vijeća;
 - e) vodi poslovanje Studentskog vijeća;

- f) podnosi obavezan izvještaj o radu Upravnom odboru svakih šest mjeseci;
- g) čuva pečat i ima ovlaštenje da ga koristi;
- h) potpisuje opšte akte i finasijsku dokumentaciju Studentskog vijeća;
- i) obavlja i druge poslove utvrđene ovim Statutom, Pravilnikom o radu Studentskog vijeća, i drugim aktima Visoke škole FINra.

Član 17.

- 1) Potpredsjednika na prijedlog Predsjednika bira Upravni odbor. Mandat potpredsjednika/zamjenika odgovara mandatu Predsjednika.
- 2) Potpredsjednik se bira većinom glasova ukupnog broja članova Upravnog odbora. Ako nijedan kandidat nije dobio takvu većinu, u drugom krugu izbora, u koji ulaze dva kandidata s najvećim brojem glasova, smatra se izabranim kandidat koji je dobio većinu glasova prisutnih.
- 3) Potpredsjednik obavlja poslove iz nadležnosti Predsjednika u slučaju njegove spriječenosti za obavljanje istih ili po njegovom ovlaštenju.

Član 18.

- 1) Sekretara Studentskog vijeća na prijedlog Predsjednika bira i razrješava Upravni odbor. Mandat generalnog sekretara odgovara mandatu Predsjednika.
- 2) Sekretar se bira većinom glasova ukupnog broja članova Upravnog odbora. Ako nijedan kandidat nije dobio takvu većinu, u drugom krugu izbora, u koji ulaze dva kandidata s najvećim brojem glasova, smatra se izabranim kandidat koji je dobio većinu glasova prisutnih.
- 3) Sekretar:
 - a) vodi zapisnik sa sjednice Upravnog odbora;
 - b) pomaže predsjedniku u radu i obavlja poslove koje mu Predsjednik povjeri;
 - c) stara se o arhivi Studentskog vijeća;
 - d) je student u skladu sa članom 3. ovog Statuta.

Stručna tijela Studentskog vijeća

Član 19.

- 1) Komisije su stručna tijela Studentskog vijeća koja obavljaju poslove iz svoje nadležnosti propisane ovim Statutom i drugim aktima.
- 2) Predsjednik Komisije se bira većinom glasova ukupnog broja članova Upravnog odbora. Ako nijedan kandidat nije dobio takvu većinu, u drugom krugu izbora, u koji ulaze dva kandidata s najvećim brojem glasova, smatra se izabranim kandidat koji je dobio većinu glasova prisutnih.
- 3) Komisija, osim predsjednika Komisije, može imati još 2, 3 ili 4 člana. Sastav Komisije Predsjedništvu predlaže predsjednik Komisije, iz redova studenata Visoke škole FINra.
- 4) Predsjednik Komisije imenuje svog zamjenika među članovima svoje Komisije.

- 5) Predsjednik Komisije podnosi izvještaj o radu Komisije najmanje jednom u tri mjeseca Predsjedništvu Studentskog vijeća.

Član 20.

Komisije Studentskog vijeća mogu biti:

- a) Komisija za nastavu i reformu;
- b) Komisija za naučno-istraživački rad;
- c) Komisija za zdravstvo, studentski standard i praksu;
- d) Komisija za ekonomiju i međunarodnu saradnju;
- e) Komisija za kulturu i sport;
- f) Komisija za informisanje i odnose sa javnošću.

Član 21.

- 1) Upravni odbor svojom Odlukom formira i ukida komisije.
- 2) Postupak razrješenja predsjednika Komisije i cijele Komisije obavlja se po postupku i na način predviđen za izbor predsjednika Komisije

Prestanak funkcije i postupak razrješenja lica u organima i tijelima

Član 22.

- 1) Licima u organima i tijelima Studentskog vijeća prestaje funkcija prije isteka vremena na koje je izabran: ostavkom, završetkom studija, razrješenjem ili istekom mandata člana Studentskog vijeća.
- 2) U slučaju podnošenja ostavke, licu prestaje funkcija danom održavanja sjednice na kojoj je podnesena ostavka, odnosno na prvoj narednoj sjednici organa ili tijela u kojem djeluje, ako je ostavka podnesena između dvije sjednice.
- 3) Prestanak funkcije konstatuje Upravni odbor.

Član 23.

- 1) Upravni odbor može razriješiti dužnosti lica u organima i tijelima Studentskog vijeća prije isteka mandata, u skladu sa postupkom predviđenim za izbor lica u organe i tijela Studentskog vijeća.
- 2) Lice u organima i tijelima Studentskog vijeća može biti razriješeno mandata ako:
 - a) prekrši Pravilnik o disciplinskoj odgovornosti studenata;
 - b) ne ispunjava dužnosti u nadležnosti njegove funkcije;
 - c) krši odredbe Zakona, Statuta Visoke škole FINra, ovog Statuta i opštih akata Studentskog vijeća;
 - d) zloupotrijebi položaj;
- 3) Prijedlog za razrješenje funkcije lica u organima i tijelima Studentskog vijeća može pokrenuti Predsjednik ili jedna trećina članova Upravnog odbora, podnošenjem pismenog zahtjeva.

- 4) Zahtjev iz stava 3. ovog člana mora sadržati i odgovarajuće detaljno obrazloženje;
- 5) Glasanje o razrješenju lica sa funkcije obavlja se na narednoj sjednici Upravnog odbora, koja mora biti održana najkasnije u roku od trideset dana od dana podnošenja prijedloga o razrješenju funkcije.
- 6) Ako Upravni odbor ne donese odluku o razrješenju lica sa funkcije, novi prijedlog za razrješenje ne može se podnijeti u roku od najmanje dva mjeseca.

Član 24.

- 1) U slučaju prestanka funkcije lica u organima i tijelima Studentskog vijeća prije mandata na koji je biran, Upravni odbor će na istoj, a najkasnije na narednoj sjednici započeti postupak izbora lica na tu funkciju, u skladu sa odredbama ovog Statuta i Pravilnika o radu Studentskog vijeća.
- 2) Ako je predsjednik Studentskog vijeća razriješen funkcije prije isteka mandata, dužnost predsjednika Studentskog vijeća, do izbora novog predsjednika, vrši zamjenik predsjednika Studentskog vijeća.

VI. ORGANIZACIJA IZBORA STUDENTSKOG VIJEĆA

Član 25.

Pravo da biraju i budu birani u organe i tijela Studentskog vijeća imaju svi studenti Visoke škole FINra, u skladu sa članom 3. I članom 11. Ovog Statuta.

Član 26.

- 1) Izbori za organe i tijela Studentskog vijeća/Studentska vijeća održavaju se, u pravilu, između 15. i 30. novembra u tekućoj akademskoj godini.
- 2) Izbore za Studentsko vijeće i Studentska vijeća raspisuje Predsjednik Upravnog odbora Studentskog vijeća.
- 3) Izborna komisija obrazuje se od strane Upravnog odbora.
- 4) Izborna komisija se sastoji od pet članova iz reda članova Upravnog odbora.
- 5) Članovi biračkih odbora, kandidati na izborima i lica u organima i tijelima Studentskog vijeća s važećim mandatom ne mogu istovremeno biti i članovi izborne komisije.
- 6) Kandidati na izbornim listama studentskih vijeća imaju pravo prigovora na tok i rezultate izbornog postupka na način i u rokovima definisanim ovim Statutom.

Član 27.

Izborna procedura preciznije se uređuje Pravilnikom o izborima, koji donosi Predsjedništvo, a naročito:

- a) način predlaganja i utvrđivanja kandidata;
- b) način održavanja izbora;
- c) vođenje biračkog spiska;

- d) uslovi za validnost kandidatura;
- e) mjesto i vrijeme izbora;
- f) trajanje glasanja;
- g) tajnost glasanja;
- h) način provjere identiteta kandidata, birača i drugih osoba koje učestvuju u izbornom postupku;
- i) učešće posmatrača;
- j) način postupanja za slučaj jednakog broja glasova pojedinih kandidata;
- k) prigovor na tok i rezultate izborne procedure.

Član 28.

Nadzor i kontrolu legalnosti izbora obavlja Nadzorni odbor u skladu sa svojim nadležnostima.

VII. FINANSIRANJE STUDENTSKOG VIJEĆA

Član 29.

Studentsko vijeće se finansira iz sljedećih izvora:

- a) iz sopstvenih prihoda;
- b) od upisnina studenata prilikom upisa godine studija;
- c) od poklona, donacija i zavještanja;
- d) iz članarina, zakupnina;
- e) iz drugih izvora u skladu sa zakonom, internim aktima Visoke škole FINra i principima Studentskog vijeća.

Član 30.

Studentsko vijeće autonomno raspolaže sredstvima za rad koja se vode na sopstvenom računu, u skladu sa zakonom i internim aktima Visoke škole FINra, te budžetom Studentskog vijeća.

Član 31.

Predsjedništvo donosi godišnji finansijski plan Studentskog vijeća i usvaja izvještaj o poslovanju i godišnji obračun na prijedlog Predsjednika.

Član 32.

Sredstva s namjenom za Studentsko vijeće uplaćuju se na njihov račun.

Član 33.

Korisnici budžetskih sredstava Studentskog vijeća dužni su namjenski trošiti doznačena sredstva u skladu sa zakonom, Statutom i budžetom Studentskog vijeća, te dostaviti izvještaj Predsjedništvu odmah po izvršenom projektu.

VIII. JAVNOST RADA STUDENTSKOG VIJEĆA

Član 34.

Rad Studentskog vijeća je javan. Javnost rada se ostvaruje putem:

- a) prisustva predstavnika javnih medija sjednicama Upravnog odbora;
- b) saopštenja, izjava i drugih obraćanja članova Predsjedništva;
- c) objavljivanja na službenoj web-stranici Visoke škole FINra

Član 35.

Sjednice organa i tijela Studentskog vijeća mogu biti zatvorene za javnost i otvorene za javnost, ovisno o pozivu predsjedavajućeg Upravnog odbora.

IX. ZAVRŠNE ODREDBE

Član 36.

Statut Studentskog vijeća usvaja se dvotrećinskom većinom ukupnog broja članova Upravnog odbora.

Član 37.

- 1) Izmjene i dopune Statuta vrše se po postupku predviđenom za njegovo donošenje.
- 2) Izmjene i dopune Statuta može predložiti svaki član Upravnog odbora.
- 3) Autentično tumačenje ovog Statuta i svih Odluka Studentskog vijeća daje Studentsko vijeće svojom Odlukom.

X. PRELAZNE ODREDBE

Član 38.

Studentsko vijeće prestaje sa radom u slučajevima određenim Zakonom o Udruženjima i Fondacijama FBiH, kao i dvotrećinskom Odlukom Upravnog odbora Studentskog vijeća o prestanku daljeg rada.

Član 39.

U slučaju prestanka rada Studentskog vijeća, imovina i sredstva Studentskog vijeća raspodjeljuju se na osnovu Odluke koju donosi Upravni odbor Studentskog vijeća.

Član 40.

Ovaj Statut stupa na snagu danom donošenja.

Datum: 18.12.2018. godine

Predsjedavajući Studentskog vijeća


